



SIARAN MEDIA KEMENTERIAN SAINS, TEKNOLOGI DAN INOVASI

PENCARIAN TECHLYMPIANS MALAYSIA TECHLYMPICS 2022 PERINGKAT ZON MALAYSIA TIMUR SARAWAK BERMULA

SIBU, 6 Oktober 2022 - Malaysia Techlympics 2022 zon Malaysia Timur Sarawak telah dilancarkan di sini hari ini bagi mencari peserta atau Techlympians yang bakal mara ke peringkat seterusnya dan merebut hadiah-hadiah bernilai sehingga RM500,000.00

Malaysia Techlympics 2022 zon Malaysia Timur Sarawak merupakan peringkat zon keempat dijalankan selepas Zon Utara, Malaysia Timur Sabah dan Zon Tengah yang diadakan pada bulan September 2022 yang lalu.

Majlis yang dirasmikan oleh Timbalan Menteri Pendidikan, Inovasi dan Pembangunan Bakat Sarawak, YB Dr. Haji Annuar Rapaee, di Universiti Teknologi Sarawak ini turut dihadiri oleh Timbalan Ketua Setiausaha (Pembudayaan dan Perkhidmatan STI), Kementerian Sains, Teknologi dan Inovasi (MOSTI), YBrs Ts. Dr. K Nagulendran dan Setiausaha Tetap, Kementerian Pendidikan, Inovasi dan Pembangunan Bakat Sarawak, YB Datu Kameri Haji Affandi.

Melihat kepada semangat yang ditunjukkan oleh para Techlympians, MOSTI yakin bahawa Malaysia mampu melahirkan generasi yang celik sains teknologi dan inovasi (STI) dan para inovator muda yang berkebolehan untuk menghasilkan solusi, aplikasi dan produk berteknologi untuk masyarakat dan kelestarian negara.

Bagi peringkat Zon Malaysia Timur Sarawak, sekitar 1,000 orang peserta sekolah rendah dan sekolah menengah dari seluruh negeri layak bersaing dalam pertandingan secara fizikal yang berlangsung selama sehari.

Malaysia Techlympics 2022 dibahagikan kepada enam (6) zon iaitu:

| ZON | TARIKH PELAKSANAAN |
|---|--------------------------|
| Utara (Perlis, Kedah, Pulau Pinang dan Perak) | 12 dan 13 September 2022 |
| Malaysia Timur Sabah dan Labuan | 23 dan 24 September 2022 |
| Tengah (Selangor, Kuala Lumpur dan Putrajaya) | 27 dan 28 September 2022 |
| Malaysia Timur Sarawak | 6 Oktober 2022 |
| Selatan (Negeri Sembilan, Melaka dan Johor) | 11 Oktober 2022 |
| Timur (Kelantan, Terengganu dan Pahang) | 17 Oktober 2022 |

Sehingga kini, seramai 1,028,983 Keluarga Malaysia yang berusia antara tujuh (7) hingga 30 tahun telah mendaftar untuk menyertai pelbagai jenis pertandingan dan sesi perkongsian STI yang diadakan sejak April hingga November 2022.

Malaysia Techlympics 2022 dilaksanakan oleh *Malaysian Research Accelerator for Technology & Innovation* (MRANTI) agensi di bawah MOSTI dan disokong dengan kerjasama kementerian dan agensi kerajaan yang lain. Inisiatif ini mensasarkan satu (1) juta penyertaan daripada para pelajar dan 2,000 idea STI yang berpotensi untuk dikomersialkan.

Bertemakan 'Berhubung, Bersaing, Berjaya', Malaysia Techlympics telah dirangka supaya bersifat inklusif agar lebih ramai golongan sasaran mendapat peluang untuk turut terlibat menghasilkan produk inovasi menggunakan pendekatan tidak formal sekali gus merencanakan aktiviti STI negara melalui *experiential learning*.

Inisiatif ini juga adalah sebahagian daripada usaha MOSTI untuk memastikan lebih ramai rakyat Malaysia khususnya golongan pelajar dan belia untuk menjadikan bidang sains, teknologi, kejuruteraan dan matematik (STEM) sebagai pilihan kerjaya masa hadapan dan seterusnya mengaplikasi pengetahuan mereka dalam kehidupan harian.

Sebanyak 25 pertandingan di bawah lima (5) kategori utama yang tertumpu kepada bidang-bidang yang membabitkan kejuruteraan, pengkomputeran dan mikro-komputer, nano, Internet benda (IoT), robotik, dron, sains, matematik, reka bentuk kreatif dan animasi serta percetakan dan pembangunan 3D telah disusun oleh MOSTI bagi menyemarakkan pertandingan dan menarik minat pelbagai lapisan pelajar.

Techlympians yang berjaya di peringkat zon akan mara untuk bersaing di peringkat negeri dan seterusnya ke peringkat kebangsaan yang akan diadakan di Axiata Arena, Bukit Jalil pada 12 hingga 13 November akan datang.

Untuk maklumat lanjut mengenai Malaysia Techlympics 2022, Keluarga Malaysia dijemput untuk melayari laman web rasmi www.techlympics.my.

TAMAT

**Disediakan oleh:
KEMENTERIAN SAINS, TEKNOLOGI DAN INOVASI
6 OKTOBER 2022**